

lisana ovim Zakonom, a tiču se načina planiranja, izrade, donošenja i izvršavanja Budžeta, budžetskih principa, zaduživanja, garancija i upravljanja dugom, programa javnih investicija, pravila fiskalne odgovornosti, računovodstva, izvještavanja, nadzora i revizije Budžeta, te drugih pitanja primjenjivat će se odredbe Zakona o budžetima u Federaciji Bosne i Hercegovine (“Službene novine Federacije BiH”, broj: 102/13, 9/14, 13/14, 8/15, 91/15, 102/15, 104/16, 5/18, 11/19 i 99/19).

#### Član 81.

U slučaju da su odredbe drugih zakona i propisa u suprotnosti sa ovim Zakonom, primjenjivat će se ovaj Zakon.

#### Član 82.

Ovaj Zakon stupa na snagu danom objavljivanja u “Službenim novinama Bosansko-podrinjskog kantona Goražde”.

Broj:01-02-934/21 PREDSEDAVAJUĆA  
28.12.2021.godine SKUPŠTINE  
Goražde Aida Sirbubalo,s.r.

965

Na osnovu člana 33.a Ustava Bosansko-podrinjskog kantona Goražde („Službene novine Bosansko-podrinjskog kantona Goražde”, broj: 8/98, 10/00, 5/03 i 8/04), **d o n o s i m:**

### U K A Z O PROGLAŠENJU ZAKONA O ZAŠTITI OD POŽARA I VATROGASTVU NA PODRUČJU BOSANSKO-PODRINJSKOG KANTONA GORAŽDE

Proglašava se Zakon o zaštiti od požara i vatrogastvu na području Bosansko-podrinjskog kantona Goražde, koji je donijela Skupština Bosansko-podrinjskog kantona Goražde, na 22. redovnoj sjednici, održanoj 28. decembra 2021.godine.

Broj:02-02-161/21  
28.12.2021.godine  
G o r a ž d e

P R E M I J E R  
Aida Obuća,s.r.

966

Na osnovu poglavlja IV, odjeljak A, člana 23. stav (1) tačka b) Ustava Bosansko-podrinjskog kantona Goražde („Službene novine Bosansko-podrinjskog kantona Goražde”, broj: 8/98, 10/00, 5/03 i 8/04), člana 165. Zakona o zaštiti od požara i vatrogastvu („Službene novine Federacije BiH”, broj: 64/09) i člana 109. Poslovnika Skupštine Bosansko-podrinjskog kantona Goražde („Službene novine Bosansko-podrinjskog kantona Goražde”, broj: 3/18 i 6/19), Skupština Bosansko-podrinjskog kantona Goražde, na 22. redovnoj sjednici, održanoj 28. decembra 2021. godine, **d o n o s i:**

### Z A K O N O ZAŠTITI OD POŽARA I VATROGASTVU NA PODRUČJU BOSANSKO-PODRINJSKOG KANTONA GORAŽDE

#### DIO PRVI - OPĆE ODREDBE

##### Član 1. (Predmet zakona)

- (1) Ovim Zakonom uređuje se nadležnost kantonalnih organa u izvršavanju poslova zaštite od požara i vatrogastvu, obaveze općine/grada i

pravnih lica u oblasti zaštite od požara i vatrogastva, organizacija i način funkcionisanja zaštite od požara i vatrogastva na području Bosansko-podrinjskog kantona Goražde (u daljem tekstu: Kanton), finansiranje, upravni i inspekcijski nadzor, te druga pitanja od značaja za organizaciju i efikasnije funkcionisanje zaštite od požara i vatrogastva na području Kantona.

- (2) Ovaj zakon i Zakon o zaštiti od požara i vatrogastvu („Službene novine Federacije Bosne i Hercegovine“, broj: 64/09) (u daljem tekstu: Federalni zakon) predstavljaju jedinstven pravni okvir za vršenje svih poslova zaštite od požara i vatrogastvu iz nadležnosti Kantona, u jedinstvenom sistemu zaštite od požara i vatrogastvu na području Federacije Bosne i Hercegovine.

## **DIO DRUGI - ZAŠTITA OD POŽARA I VATROGASTVO**

### **POGLAVLJE I - OPĆI PRINCIPI**

#### **Član 2. (Jedinstven sistem zaštite i spašavanja)**

- (1) Zaštita od požara i vatrogastvo organiziraju se, funkcioniraju i čine dio jedinstvenog sistema zaštite i spašavanja ljudi i materijalnih dobara od prirodnih i drugih nesreća (u daljem tekstu: prirodne i druge nesreće).

#### **Član 3. Djelatnost od posebnog interesa**

- (1) Zaštita od požara je djelatnost od posebnog interesa za Kanton i općinu

/Grad, a ostvaruje se na način predviđen Federalnim zakonom, ovim Zakonom i podzakonskim aktima, kao i međunarodnim tehničkim normativima i standardima koji važe u Bosni i Hercegovini.

#### **Član 4. (Nosioци organiziranja i provođenja zaštite od požara)**

- (1) Osnovni nosioци organiziranja, pripremanja i provođenja zaštite od požara i vatrogasne djelatnosti su općina/grad i Kanton, pa su isti dužni osigurati njihovo trajno i neometano obavljanje, na način predviđen Federalnim i ovim Zakonom.
- (2) Odgovorna lica za organiziranje zaštite od požara su:
- vlasnik, odnosno korisnik imovine, kada se radi o privatnom vlasništvu;
  - rukovodilac organa uprave, upravne organizacije i drugog organa u kantonu i općini/gradu;
  - direktor, odnosno drugo odgovorno lice u privrednom društvu i drugom pravnom licu, određeno općim aktom pravnog lica.

#### **Član 5. (Obaveza provođenja zaštite od požara)**

- (1) Zaštita od požara mora se organizirati i provoditi na svim mjestima, prostorijama i objektima, koji prisutnim ili mogućim opasnostima od požara ugrožavaju ljudske živote ili imovinu drugih vlasnika.
- (2) Zaštitu od požara dužni su da organiziraju i provode pravna i fizička lica, kantonalni i općinski organi i dr-

uge institucije koji su vlasnici ili korisnici građevina i prostora, definisanih u Federalnom zakonu, na način određen Federalnim zakonom, ovim Zakonom, propisima donesenim na osnovu zakona, priznatim pravilima i standardima, planovima zaštite od požara, odlukama organa uprave i lokalne samouprave, te općim aktima pravnih lica.

- (3) Zaštitu od požara u šumama, na šumskom i poljoprivrednom zemljištu dužni su da organiziraju i provode sva pravna i fizička lica koja su vlasnici ili korisnici istih, kao i organi uprave kantona i općine/grada, koji su nadležni za šume, šumska zemljišta i poljoprivredno zemljište, u skladu sa propisima koji se odnose na šume, šumsko i poljoprivredno zemljište i Federalnim/kantonalnim zakonom.
- (4) Zaštitu od požara dužni su da provode i građani, u svojim stanovima i stambenim zgradama (kućama) i drugim objektima i prostorima koje koriste za svoje potrebe.
- (5) Vlasnik imovine, u smislu stava (2) ovog člana, je fizičko ili pravno lice, državni organ ili druga institucija, sa zaštićenim najširim ovlaštenjima posjedovanja, korištenja i raspolaganja nekom stvari, dok je korisnik imovine fizičko ili pravno lice, državni organ ili druga institucija, koji na osnovu ugovora koristi imovinu vlasnika, sa preuzetom obavezom po pitanju zaštite od požara.
- (6) Svaki pojedinac ima obavezu da vodi računa da svojim postupcima ne ugrožava živote ljudi i imovinu drugih vlasnika ili posjednika.

#### **Član 6. (Pojam zaštite od požara)**

Zaštita od požara obuhvata skup mjera i radnji upravne, organizacijske, stručne, tehničke, obrazovne i propagandne prirode, koje se poduzimaju u cilju sprečavanja izbijanja i širenja požara, njegovog otkrivanja, te zaštite ljudi, biljnog i životinjskog svijeta, materijalnih, kulturnih, istorijskih i drugih dobara i okoliša (u daljem tekstu: materijalna dobra).

#### **Član 7. (Pojam vatrogastva)**

Vatrogastvo obuhvata skup mjera i radnji upravne, organizacijske, stručne, kadrovske, tehničke, obrazovne i propagandne prirode, koje se poduzimaju u cilju gašenja požara i spašavanja ljudi i materijalnih dobara ugroženih požarom, te pružanje tehničke pomoći u akcidentnim situacijama.

#### **Član 8. (Javnost rada)**

- (1) Javnost ima pravo da bude obaviještena o svim pitanjima iz oblasti zaštite od požara i vatrogastva.
- (2) Podaci o stanju zaštite od požara i vatrogastva su javni.

#### **Član 9. (Opća prava)**

- (1) Niko nema pravo da svojim materijalnim dobrima i svojim postupcima, neprovođenjem mjera zaštite od požara propisanih ovim Zakonom i drugim propisima, dovodi u opasnost

od požara tuđi život i zdravlje i materijalna dobra.

- (2) Svako fizičko lice ima pravo na zaštitu svog života i zdravlja od požara, koja se osigurava u skladu sa ovim Zakonom i drugim propisima.

#### **Član 10.**

##### **(Popularisanje vatrogasne djelatnosti)**

- (1) U svrhu popularisanja vatrogasne djelatnosti i značajnijeg poduzimanja aktivnosti u provođenju preventivnih mjera zaštite od požara, ustanovljava se stalna tradicionalna manifestacija pod nazivom MJESECI ZAŠTITE OD POŽARA, koja se održava svake godine tokom maja i oktobra, a organiziraju je i provode vatrogasne jedinice, vatrogasna društva, vatrogasni savezi i organi uprave civilne zaštite u Kantonu, u skladu sa programom koji oni donose.
- (2) Dan vatrogasaca Bosansko-podrinjskog kantona Goražde je 4. maj - Svjetski dan vatrogasaca.

## **POGLAVLJE II - PRAVA I DUŽNOSTI ORGANA KANTONA, OPĆINE/GRADA I GRADA**

#### **Član 11.**

##### **(Nadležnost Skupštine)**

- (1) Skupština Kantona u okviru Programa razvoja zaštite i spašavanja od prirodnih i drugih nesreća u Kantonu, utvrđuje ciljeve, smijer i strategiju razvoja zaštite od požara i vatrogastva u Kantonu, kao sastavni dio tog programa.
- (2) Skupština donosi Plan zaštite od požara Kantona.

#### **Član 12.**

##### **(Nadležnost Vlade)**

Vlada Kantona, u oblasti zaštite od požara i vatrogastva:

- a) donosi Procjenu ugroženosti od požara za Kanton, u okviru Procjene ugroženosti od prirodnih i drugih nesreća u Kantonu;
- b) predlaže Plan zaštite od požara Kantona i obezbjeđuje njegovu realizaciju;
- c) predlaže Program razvoja zaštite i spašavanja od prirodnih i drugih nesreća u Kantonu, u kojem se utvrđuju i pitanja za zaštitu od požara i vatrogastva za Kanton;
- d) na prijedlog Kantonalne uprave civilne zaštite, a na osnovu Programa razvoja zaštite i spašavanja Kantona, donosi godišnji plan aktivnosti na realizaciji zadataka utvrđenih za zaštitu od požara i vatrogastvo;
- e) odlučuje o formiranju zajedničke vatrogasne jedinice za gašenje požara na području Kantona, na prijedlog Kantonalne uprave civilne zaštite shodno procjeni ugroženosti od požara i programa razvoja zaštite od požara i vatrogastva na nivou Kantona;
- f) razmatra stanje zaštite od požara i vatrogastva na području Kantona i utvrđuje odgovarajuće mjere za dogradnju i efikasno funkcionisanje vatrogastva;
- g) planira potrebna finansijska sredstva u Budžetu Kantona za finansiranje potreba zaštite od požara i vatrogastva iz nadležnosti Kantona;
- h) na prijedlog Kantonalne uprave civilne zaštite utvrđuje istraživa-

čke i razvojne projekte, određuje izvršioce i saradnike za izradu i ocjenu istraživačkih i razvojnih projekata u oblasti zaštite od požara i vatrogastva i određuje način finansiranja tih projekata;

- i) osigurava kadrovske, materijalne, tehničke i druge potrebe za efikasno funkcionisanje vatrogastva na području Kantona i odgovorna je za funkcionisanje vatrogastva u općinama na području Kantona, u skladu sa ovim Zakonom i propisima Kantona;
- j) vrši i druge poslove iz oblasti zaštite od požara i vatrogastva, u skladu sa ovim Zakonom i drugim propisima.

**Član 13.**  
**(Nadležnost ministarstava i drugih organa)**

(1) Kantonalna ministarstva i drugi organi Kantona, u oblasti zaštite od požara i vatrogastva, u okviru svog djelokruga rada, dužni su svojim općim aktima urediti pitanja koja se odnose na organizaciju i provođenje zaštite od požara, radi zaštite ljudstva i materijalnih dobara koja koriste u svom radu, i to:

- a) utvrditi način organiziranja i ostvarivanje zaštite od požara, u skladu sa Federalnim zakonom, ovim Zakonom i podzakonskim propisima;
- b) predvidjeti mjere za provođenje i unapređenje zaštite od požara;
- c) utvrditi način upoznavanja zaposlenih lica sa opasnostima od požara na radnom mjestu;
- d) odrediti dužnost i odgovornost svih zaposlenih lica u provode-

nju propisanih mjera zaštite od požara;

- e) propisati obavezu i način stručnog osposobljavanja zaposlenih lica s mjerama zaštite od požara i izraditi posebna radna upustva za to;
  - f) odrediti lice zaduženo za staranje o provođenju mjera zaštite od požara, utvrđenih općim aktom;
  - g) utvrditi sadržaj i način donošenja svog plana zaštite od požara i način njegovog provođenja;
  - h) urediti vršenje unutarnje kontrole provođenja mjera zaštite od požara;
  - i) odrediti mjesta i prostore na kojima se zabranjuje upotreba otvorene vatre;
  - j) utvrditi dužnosti i način postupanja zaposlenih lica u slučaju pojave požara;
  - k) propisati disciplinsku odgovornost za zaposlena lica zbog nepridržavanja propisanih mjera zaštite od požara.
- (2) Kantonalna ministarstva i drugi organi Kantona dužni su:
- a) organizirati, planirati i osigurati provođenje preventivnih mjera za zaštitu vlastitih uposlenika, materijalnih sredstava i objekata koje koriste u svom radu;
  - b) učestvovati u izradi planskih dokumenata iz oblasti zaštite od požara i vatrogastva, u pitanjima iz oblasti za koju su osnovani i koja se utvrde tim dokumentima, i to:
    - 1) Procjene ugroženosti od požara Kantona, u okviru Procjene ugroženosti od prirodnih i drugih nesreća Kantona;

- 2) Programa razvoja zaštite od požara i vatrogastva, u okviru Programa razvoja zaštite i spašavanja od prirodnih i drugih nesreća Kantona;
  - 3) Plana zaštite od požara Kantona;
- c) u okviru svoje redovne djelatnosti, realiziraju zadatke u oblasti zaštite od požara, koji su utvrđeni u dokumentima iz tačke b) ovog člana i koji se odnose na oblast za koju su osnovani;
  - d) donose plan zaštite od požara za vlastite potrebe, ukoliko su određeni u Planu zaštite od požara Kantona, saglasno federalnom propisu o razvrstavanju građevina tih organa u odgovarajuće kategorije ugroženosti od požara;
  - e) ostvarivati stalnu saradnju sa Kantonalnom upravom civilne zaštite o svim pitanjima od značaja za planiranje, organiziranje i provođenje zaštite od požara i vatrogastva, iz nadležnosti Kantona;
  - f) dostavljati Kantonalnoj upravi pisana obavještenja, podatke ili izvještaje o podacima vezanim za pitanje zaštite od požara i vatrogastvu, iz oblasti za koju su osnovani;
  - g) ostvariti stalnu saradnju i pružati stručnu pomoć općinskim službama civilne zaštite i općinskim službama za upravu, u smislu osiguranja svih potrebnih podataka pri izradi planskih dokumenata općina, vezanih za zaštitu od požara i vatrogastvo, iz oblasti za koju su osnovani;
  - h) vršiti i druge poslove u oblasti

- i) zaštite od požara i vatrogastva, u skladu sa Federalnim zakonom, ovim Zakonom, te drugim propisima i općim aktima iz ove oblasti.

#### **Član 14.**

##### **(Nadležnost Kantonalne uprave civilne zaštite)**

- (1) Kantonalna uprava civilne zaštite, u oblasti zaštite od požara i vatrogastva, vrši sljedeće poslove:
  - a) poduzima odgovarajuće mjere i aktivnosti na organizovanju i provođenju zaštite od požara i vatrogastva na području Kantona, u skladu sa ovim Zakonom;
  - b) izrađuje procjenu ugroženosti od požara od značaja za Kanton, u okviru Procjene ugroženosti od prirodnih i drugih nesreća za područje Kantona, uz učešće kantonalnih ministarstava;
  - c) priprema program razvoja zaštite i spašavanja od prirodnih i drugih nesreća Kantona, u okviru kojeg uređuje pitanja koja se odnose na razvoj zaštite od požara i vatrogastva od značaja za Kanton;
  - d) priprema plan zaštite od požara Kantona, u saradnji sa kantonalnim ministarstvima;
  - e) predlaže godišnji plan aktivnosti na realizaciji zadataka utvrđenih za zaštitu od požara i vatrogastvo;
  - f) ostvaruje saradnju sa općinskim službama civilne zaštite na području Kantona u pitanjima od značaja za Kanton i tim službama pruža stručnu i drugu pomoć u oblasti zaštite od požara i organi-

- ziranja profesionalnih vatrogasnih jedinica općine/ grada;
- g) organizira, priprema i provodi sve poslove koji se odnose na osnivanje zajedničke profesionalne vatrogasne jedinice kantona i poduzima mjere na njenoj popuni ljudstvom i planiranju i nabavci vatrogasne opreme, tehničkih i drugih sredstava neophodnih za rad i funkcionisanje te jedinice;
  - h) poduzima i predlaže mjere u oblasti organiziranja i provođenja stručne obuke i osposobljavanja pripadnika vatrogasne jedinice i drugih lica za potrebe vatrogastva, u skladu sa ovim Zakonom i propisima Kantona;
  - i) pruža stručnu i drugu pomoć dobrovoljnim vatrogasnim društvima formiranim na području Kantona na njihovom osposobljavanju za vršenje poslova iz njihove nadležnosti od značaja za zaštitu od požara i vatrogastvo i ostvaruje posebnu saradnju sa pravnim licima koja su formirala vatrogasne jedinice radi rješavanja pitanja od zajedničkog interesa za vatrogastvo;
  - j) vrši inspekcijski nadzor iz oblasti zaštite od požara i vatrogastva, u skladu s ovim Zakonom;
  - k) ostvaruje odgovarajuću saradnju sa Federalnom upravom civilne zaštite, kao i sa kantonalnim upravama civilne zaštite drugih kantona o pitanjima od zajedničkog interesa za zaštitu od požara i vatrogastvo;
  - l) vrši i druge poslove iz oblasti zaštite od požara i vatrogastva, u skladu sa ovim Zakonom.

- (2) Za vršenje poslova iz stava (1) ovog člana u Kantonalnoj upravi civilne zaštite osniva se organizacijska jedinica za zaštitu od požara i vatrogastvo.

**Član 15.**  
**(Nadležnost općine/ grada)**

- (1) Općina/ grad, u oblasti zaštite od požara i vatrogastva:
  - a) svojim propisom uređuje organizaciju i funkcionisanje zaštite od požara i vatrogastva na području općine/ grada, u skladu s Federalnim zakonom i ovim Zakonom te osigurava provođenje te zaštite;
  - b) organizira i provodi zaštitu od požara iz nadležnosti općine/ grada, u skladu s Federalnim zakonom, ovim Zakonom i propisima općine/ grada;
  - c) organizira profesionalnu vatrogasnu jedinicu općine/ grada, za gašenje požara, te osigurava kadrovske, materijalne, tehničke i druge uvjete koji su potrebni za uspješno i efikasno funkcionisanje te jedinice, u skladu s Federalnim zakonom, ovim Zakonom i propisima općine/ grada;
  - d) utvrđuje procjenu ugroženosti od požara, kao program razvoja zaštite od požara i vatrogastva iz nadležnosti općine/ grada, u okviru procjene ugroženosti, odnosno programa razvoja zaštite i spašavanja od prirodnih i drugih nesreća;
  - e) donosi plan zaštite od požara općine/ grada i osigurava njegovo realiziranje;

- f) planira i osigurava finansijska sredstva u budžetu općine/grada za potrebe zaštite od požara i vatrogastva;
  - g) vrši i druge poslove zaštite od požara i vatrogastva, u skladu s Federalnim zakonom i ovim Zakonom.
- (2) Propisom iz stava 1. tačke a) ovog člana utvrđuje se nadležnost općinskih, odnosno gradskih tijela vlasti u izvršavanju poslova iz stava (1) ovog člana, kao i pitanja koja nisu uređena ovim Zakonom, a važna su za organiziranje i efikasno funkcionisanje zaštite od požara i vatrogastva na području općine/grada.

#### **Član 16.**

##### **(Nadležnost službe civilne zaštite općine/grada)**

- (1) Općinska odnosno gradska služba civilne zaštite, u oblasti zaštite od požara i vatrogastva, vrši slijedeće poslove:
- a) poduzima odgovarajuće mjere i aktivnosti na organiziranju i provođenju zaštite od požara i vatrogastva na području općine/grada u skladu s Federalnim zakonom, ovim Zakonom i propisima općine/grada;
  - b) obavlja stručne i druge poslove koji se odnose na organiziranje profesionalne vatrogasne jedinice općine/grada i predlaže i poduzima mjere na osiguranju kadrovskih, materijalnih, tehničkih i drugih uvjeta potrebnih za efikasan rad i funkcionisanje te jedinice i u tim pitanjima ostvaruje saradnju sa kantonalnom uprav-

- om za civilnu zaštitu i vatrogastvo;
- c) definira i predlaže pitanja koja se odnose na razvoj zaštite od požara i vatrogastva u okviru programa razvoja zaštite i spašavanja od prirodnih i drugih nesreća općine/grada, a što se vrši u saradnji sa ostalim službama za upravu općine/grada;
- d) izrađuje plan zaštite od požara općine/grada i osigurava njegovu realizaciju uz učešće službi za upravu općine/grada;
- e) planira i osigurava provođenje obuke i stručno osposobljavanje i usavršavanje pripadnika vatrogasne jedinice iz stava (1) tačke b) ovog člana i drugih lica koja se bave poslovima vatrogastva;
- f) pruža stručnu i drugu pomoć dobrovoljnim vatrogasnim društvima radi uspješnog obavljanja poslova zaštite od požara i vatrogastva iz njihove nadležnosti od značaja za vatrogastvo, a posebne aktivnosti provodi kod onih vatrogasnih društava u kojima je osnovana dobrovoljna vatrogasna jedinica radi osposobljavanja te jedinice za efikasno učešće u gašenju požara;
- g) ostvaruje saradnju s pravnim licima u kojima su osnovane vatrogasne jedinice radi osposobljavanja tih jedinica za efikasno gašenje požara i mogućeg učešća tih jedinica na gašenju požara van objekata i prostora pravnog lica na području općine/grada;
- h) ostvaruje saradnju sa službama civilne zaštite susjednih općina u pitanjima od zajedničkog interesa za zaštitu od požara i vatro-



- gastva;
- i) vrši i druge poslove iz oblasti zaštite od požara i vatrogastva koji su Federalnim zakonom, ovim Zakonom i odlukama općinskog odnosno gradskog vijeća stavljene u nadležnost službe civilne zaštite općine/ grada.
- (2) Za vršenje poslova iz stava (1) ovog člana u općinskoj, odnosno gradskoj službi civilne zaštite, osniva se organizaciona jedinica za zaštitu od požara i vatrogastva, izuzev lokalnih zajednica koje spadaju u kategoriju ekonomski nerazvijene, s manje od 15.000 stanovnika, sve dok se ne steknu uvjeti i ne realiziraju obaveze propisane Federalnim zakonom prema takvoj općini.

### **POGLAVLJE III - PROGRAMIRANJE RAZVOJA ZAŠTITE OD POŽARA I VATROGASTVA**

#### **Član 17.**

#### **(Programiranje razvoja zaštite od požara i vatrogastva)**

- (1) Programiranje razvoja zaštite od požara i vatrogastva iz nadležnosti Kantona, općine/ grada vrši se u okviru Programa razvoja zaštite i spašavanja Kantona općine/ grada.
- (2) To programiranje se vrši u skladu sa Procjenom ugroženosti od požara područja Kantona, općine/ grada i drugih činjenica važnih za programiranje, na period od najmanje pet godina.
- (3) Sadržaj programa razvoja zaštite od požara i vatrogastva obuhvata politiku i strategiju i akcione planove u

okviru kojih se definiraju vizija, načela i opredjeljenja, ciljevi i područja razvoja za organiziranje i provođenje zaštite od požara i vatrogastvo sa svim elementima potrebnim za njegovo usavršavanje i efikasno funkcionisanje, od značaja za Kanton.

- (4) Na osnovu programa iz stava (1) ovog člana, Vlada Kantona na prijedlog Kantonalne uprave civilne zaštite, donosi godišnji plan aktivnosti na realizaciji zadataka utvrđenih za zaštitu od požara i vatrogastvo, što se određuje prema utvrđenim prioritetima.

### **POGLAVLJE IV - ORGANIZACIJA I FUNKCIONISANJE, PLANIRANJE I PROVOĐENJE MJERA ZAŠTITE OD POŽARA I VATROGASTVA**

#### **Odjeljak A. Kantonalna uprava civilne zaštite**

#### **Član 18.**

#### **(Obaveze Kantonalne uprave u izradi planskih dokumenata)**

- (1) Kantonalna uprava je nosilac aktivnosti oko priprema i izrade planskih dokumenata Kantona, i to:
  - a) Procjene ugroženosti od požara Kantona, u okviru procjene ugroženosti od prirodnih i drugih nesreća u Kantonu, uz obavezno učešće subjekata iz člana 13. stav (2) tačka b) ovog Zakona, a uzimajući u obzir općinske procjene ugroženosti od požara. Način izrade i sadržaj procjene ugroženosti od požara regulisan je propisom Vlade Federacije;
  - b) Programa razvoja zaštite od požara i vatrogastva, u okviru Pro-

grama razvoja zaštite i spašavanja od prirodnih i drugih nesreća Kantona. Program razvoja zaštite od požara i vatrogastva obuhvata politiku, strategiju i akcione planove, u okviru kojih se defini- ra vizija, načela, opredjeljenja, ciljevi i područja razvoja za orga- niziranje i provođenje zaštite od požara i vatrogastvo, sa svim el- ementima potrebnim za njegovo usavršavanje i efikasno funkcionisanje od značaja za Kanton, za period od najmanje pet godina;

- c) Plana zaštite od požara Kantona, uz obavezno učešće subjekata iz člana 13. stav (2) tačka b) ovog Zakona. Način izrade i sadržaj plana zaštite od požara propisan je podzakonskim aktom Vlade Federacije. Plan se izrađuje na osnovu procjene ugroženosti od požara na području Kantona i kadrovskim, materijalnim i dru- gim uvjetima koji su od značaja za tu zaštitu, uz obavezno uzi- manje u obzir potreba utvrđenih u procjenama ugroženosti od po- žara svih općina sa područja Kan- tona.

#### **Član 19.**

##### **(Praćenje organizacije i provođenja poslova zaštite od požara)**

- (1) Kantonalna uprava za civilnu zaštitu prati organizaciju i provođenje poslova zaštite od požara i vatrogastva u pravnim licima, kantonalnim organima i drugim institucijama u Kan- tonu, koji su Federalnim zakonom, ovim Zakonom i drugim propisima stavljeni u njenu nadležnost.

#### **Član 20.**

##### **(Izvršavanje zadataka utvrđenih u planskim dokumentima)**

- (1) Kantonalna uprava za civilnu zaštitu izvršava zadatke zaštite od požara i vatrogastva, utvrđene u dokumenti- ma iz člana 14. ovog Zakona, i ostva- ruje saradnju sa kantonalnim ministarstvima i drugim organima Kan- tona u izvršavanju zadataka zaštite od požara i vatrogastva iz njihove nadležnosti.

#### **Član 21.**

##### **(Neposredno učešće i pomoć u akcijama)**

- (1) Kantonalna uprava za civilnu zaštitu pruža pomoć u akcijama zaštite i spašavanja ljudi i materijalnih doba- ra, koji su ugroženi požarom ili eks- plozijama na način utvrđen članom 96. stav (1) i (2) Federalnog zakona.

#### **Član 22.**

##### **(Planiranje i nabavka opreme)**

- (1) Kantonalna uprava za civilnu zaštitu neposredno poduzima ili predlaže odgovarajuće mjere na planiranju i nabavci tehničkih sredstava i vatro- gasne opreme potrebne za vatrogast- vo u Kantonu, saglasno zakonskim i drugim propisima iz ove oblasti.

#### **Član 23.**

##### **(Informacioni sistem za zaštitu od požara)**

- (1) Kantonalna uprava za civilnu zašti- tu, u okviru Kantonalnog operativ- nog centra, organizira funkcionalni dio informacionog sistema za zaštitu

od požara i vatrogastvo, u skladu sa podzakonskim propisom o tim centrima, donesenim na osnovu Zakona o zaštiti i spašavanju ljudi i materijalnih dobara od prirodnih i drugih nesreća, te drugim federalnim propisima.

**Član 24.**  
**(Saradnja sa općinskim/gradskim službama civilne zaštite)**

- (1) Kantonalna uprava za civilnu zaštitu osigurava saradnju sa općinskim/gradskim službama civilne zaštite na području Kantona, o pitanjima zaštite od požara i vatrogastvu, koja su Federalnim i ovim Zakonom stavljena u nadležnost općine/grada i od značaja su za Kanton, te istim pruža stručnu i drugu pomoć, u cilju pravilnog i potpunog vršenja tih poslova, te organiziranja profesionalnih vatrogasnih jedinica općina.
- (2) Pod saradnjom iz stava (1) smatra se i međusobno dostavljanje izvještaja i drugih akata, koji se odnose na zaštitu od požara i vatrogastvo, a radi evidentiranja stanja ili daljne obrade za potrebe Kantonalne uprave, općinskih/gradskih službi civilne zaštite ili drugih subjekata.

**Član 25.**  
**(Osnivanje kantonalne profesionalne vatrogasne jedinice)**

- (1) Kanton osniva profesionalnu vatrogasnu jedinicu onda kada se na osnovu procjene ugroženosti od požara područja kantona uvažavajući i pokazatelje iz procjena ugroženosti od požara općina i grada sa područja kantona procijeni da ti pokazatelji

opredjeljuju njeno osnivanje, s tim da se obavezno uzimaju u obzir i raspoloživi kadrovski, materijalni, finansijski i drugi uvjeti kojima raspolaže kanton, općine/grada i da je racionalno i ekonomično osnovati zajedničku vatrogasnu jedinicu kantona.

- (2) Na osnovu tako utvrđenih pokazatelja, Vlada Kantona i općinski načelnici, odnosno gradonačelnici sa područja kantona odlučuju o osnivanju zajedničke profesionalne vatrogasne jedinice na nivou kantona, za potrebe kantona i svih ili pojedinih općina i grada sa područja kantona koji učestvuju u osnivanju te jedinice.
- (3) Ako Kanton osnuje zajedničku profesionalnu vatrogasnu jedinicu za potrebe kantona i svih općina/grada ili nekoliko njih sa područja Kantona, Kantonalna uprava za civilnu zaštitu organizira, priprema i provodi sve poslove koji se odnose na osnivanje ovakve jedinice, njenu popunu ljudstvom, planiranju i nabavci vatrogasne opreme, tehničkih i drugih sredstava neophodnih za rad i funkcionisanje takve jedinice.
- (4) Osnivanjem kantonalne zajedničke profesionalne vatrogasne jedinice iz stava 1. ovog člana, na području svake općine/grada bila bi uspostavljena njena ispostava, u skladu sa Federalnim zakonom.

**Član 26.**  
**(Organiziranje i realizacija obuke)**

- (1) Kantonalna uprava za civilnu zaštitu poduzima i predlaže mjere u oblasti organizovanja i provođenja stručne obuke i osposobljavanja pripadnika vatrogasne jedinice i drugih lica za

potrebe vatrogastva, u skladu sa Federalnim i ovim Zakonom.

- (2) Obuka, vrste tema i način njihove obrade utvrđuju se planovima i programima obuke.

**Član 27.**  
**(Stručna pomoć dobrovoljnim vatrogasnim društvima i pravnim licima)**

- (1) Kantonalna uprava za civilnu zaštitu ima obavezu pružati stručnu i drugu pomoć dobrovoljnim vatrogasnim društvima formiranim na području Kantona, na njihovom osposobljavanju za vršenje poslova iz njihove nadležnosti od značaja za zaštitu od požara i vatrogastvo.
- (2) Na način definisan u stavu (1) ovog člana, a posebno radi rješavanja pitanja od zajedničkog interesa za vatrogastvo, Kantonalna uprava za civilnu zaštitu će postupati i u odnosu na pravna lica koja su formirala vatrogasne jedinice.

**Član 28.**  
**(Saradnja sa Federalnom upravom i drugim kantonalnim upravama civilne zaštite)**

- (1) Kantonalna uprava za civilnu zaštitu ostvaruje saradnju sa Federalnom upravom civilne zaštite i kantonalnim upravama civilne zaštite susjednih kantona, o pitanjima od zajedničkog interesa za zaštitu od požara i vatrogastvo.
- (2) Međusobna saradnja, u smislu odredbi stava (1) ovog člana, ostvaruje se razmjenom podataka, zajedničkim radnim sastancima, obukom, pokaznim vježbama, intervencijama i dru-

gim vidovima saradnje, koji se pokazuju opravdanim u datoj situaciji.

**Član 29.**  
**(Statistička istraživanja iz oblasti zaštite od požara i vatrogastva)**

- (1) Kantonalna uprava za civilnu zaštitu predlaže statistička istraživanja iz oblasti zaštite od požara i vatrogastva, za svoje područje.

**Član 30.**  
**(Obveze kod izdavanja rješenja o građenju i upotrebu građevine)**

- (1) Ministarstvo za urbanizam, prostorno uređenje i zaštitu okoline Bosansko-podrinjskog kantona Goražde (u daljem tekstu: nadležni kantonalni organ) dužno je pribaviti prethodno mišljenje od Kantonalne uprave prilikom donošenja rješenja da li pravno lice ispunjava uvjete utvrđene Federalnim zakonom i podzakonskim propisom, za davanje stručne ocjene i mišljenja da su u tehničkoj dokumentaciji u potpunosti primijenjeni propisi i standardi i drugi normativi zaštite od požara, te da je osigurana funkcionalnost i efikasnost projektom predviđenih mjera zaštite od požara.
- (2) Kantonalna uprava za civilnu zaštitu daje jednog člana u komisiju za pregled izgrađene, rekonstruirane, dograđene ili nadograđene građevine, ili istog predlaže iz drugog organa ili pravnog lica, koji ispunjava uvjete iz Federalnog zakona. Bez dokumentiranog mišljenja ovog člana komisije da su provedene sve mjere zaštite od požara predviđene u elaboratu zaš-

tite od požara, kao i odgovarajuća pravila tehničke prakse, nadležni kantonalni organ uprave iz stava (1) ovog člana ne može izdati odobrenje za upotrebu te građevine.

## **Odjeljak B. Zaštita od požara i vatrogastva u općini/gradu i drugim pravnim licima**

### **Član 31. (Pravno regulisanje i organizovanje zaštite od požara)**

- (1) Općina/grad je dužna da organizuje zaštitu od požara i vatrogastvo na svom području i vodi brigu o uspješnom sprovođenju i poduzimanju mjera za unapređenje zaštite od požara i vatrogastva.
- (2) Općina/Grad je obavezna donijeti propis (odluku), kojom će pravno urediti nadležnosti, organizaciju i funkcionisanje zaštite od požara i vatrogastvo na svom području, u skladu sa Federalnim i ovim Zakonom.
- (3) Upravne, stručne i druge poslove zaštite od požara i vatrogastva iz nadležnosti općine/grada, vrši organizacijska jedinica za zaštitu od požara i vatrogastvo, koja se nalazi u sastavu općinske/gradske službe civilne zaštite.
- (4) Općinska/gradska služba civilne zaštite predlaže i vodi statistička istraživanja iz oblasti zaštite od požara i vatrogastva za svoje područje.

### **Član 32. (Organizacija dimnjačarske djelatnosti)**

Općinsko, odnosno gradsko vijeće svojom odlukom uređuje organizaciju

i rad dimnjačarske djelatnosti, rokove čišćenja dimnjaka, uvjete za vršenje dimnjačarske službe, te druga pitanja od značaja za obavljanje dimnjačarske djelatnosti, te obavljanje nadzora nad radom dimnjačarske službe.

### **Član 33. (Organiziranje vatrogasnih jedinica)**

- (1) Općina/grad je dužna osnovati svoju profesionalnu vatrogasnu jedinicu ili zajedničku jedinicu, sa jednom ili više susjednih općina/gradova, ili sa jednim ili više pravnih lica sa područja općine/grada, na način propisan Federalnim zakonom.
- (2) Smatra se da je na odgovarajući način riješeno pitanje vatrogasne jedinice u općini/gradu, ukoliko Kanton osnuje zajedničku profesionalnu vatrogasnu jedinicu, pod uvjetima i na način propisan Federalnim zakonom.
- (3) Profesionalnu vatrogasnu jedinicu u općini/gradu čine vatrogasci koji se nalaze u radnom odnosu u općinskoj/gradskoj službi civilne zaštite. Popuna ove jedinice ljudstvom vrši se, po pravilu, na teritorijalnom principu, što je u cilju ostvarivanja roka za gašenje požara iz stava (5) ovog člana.
- (4) U zavisnosti od toga da li profesionalnu vatrogasnu jedinicu osniva sama ili sa drugim općinama ili pravnim licima, općina/grad osigurava kadrovske, materijalne, tehničke i druge uvjete za funkcionisanje te jedinice, u skladu sa Federalnim zakonom, ovim Zakonom, propisom općine/grada ili sporazumom.
- (5) U planu zaštite od požara, pored drugih zakonom i podzakonskim

aktom definisanih pitanja, utvrđuje se minimalan rok za izlazak profesionalne vatrogasne jedinice na intervenciju, imajući u vidu da to bude u što kraćem roku, cijeneći udaljenost pojedinih mjesta od sjedišta te jedinice.

- (6) Izuzetno, općina koja spada u kategoriju ekonomski nerazvijene, s manje od 15.000 stanovnika, pa zbog toga nije u mogućnosti osigurati sredstva potrebna za finansiranje svoje profesionalne vatrogasne jedinice, a istovremeno već ima dobrovoljnu vatrogasnu jedinicu, formiranu u skladu sa Federalnim zakonom i drugim propisima iz te oblasti, koju finansira iz svojih budžetskih i drugih izvora, te ima zaključen ugovor ili drugi akt kojim se definišu međusobna prava i obaveze, smatrat će se da je djelimično riješila pitanje vatrogasne djelatnosti, sve dok se ne steknu uvjeti i ne realiziraju obaveze propisane Federalnim zakonom prema takvoj općini.

**Član 34.**  
**(Snage za obavljanje vatrogasne djelatnosti)**

Snage za obavljanje vatrogasne djelatnosti na području općine/ grada su:

- a) osnovne snage za obavljanje vatrogasne djelatnosti, i to:
- 1) zajednička profesionalna vatrogasna jedinica na nivou Kantona, ukoliko to bude opredjeljenje općine/ grada i Vlade Kantona;
  - 2) profesionalna vatrogasna jedinica općine/ grada, koju čine vatrogasci u radnom odnosu u općinskoj službi civilne zaštite;

- 3) zajednička profesionalna vatrogasna jedinica više općina, osnovana sporazumom tih općina ili profesionalna vatrogasna jedinica osnovana sporazumom općine/ grada i pravnih lica sa područja općine/ grada.

- b) dopunske snage za vatrogastvo, koje mogu činiti:

- 1) dobrovoljne vatrogasne jedinice, koje osnivaju dobrovoljna vatrogasna društva;
- 2) vatrogasne jedinice pravnih lica;

- c) snage koje djeluju u toku izvođenja vatrogasne intervencije ili u drugim situacijama, i to:

- 1) jedinice civilne zaštite;
- 2) službe zaštite i spašavanja;
- 3) općinski/ gradski štab civilne zaštite;
- 4) povjerenici civilne zaštite.

- d) operativni centar civilne zaštite, kao komunikacijsko - informacijska podrška općinskom/ gradskom štabu civilne zaštite i drugim organima koji rukovode akcijama zaštite na području ugroženom od požara.

**Član 35.**  
**(Prijem u radni odnos na određeno vrijeme)**

- (1) Kantonalna uprava civilne zaštite i općinske službe civilne zaštite mogu u toku ljeta, kada je povećana opasnost od izbijanja požara prema godišnjem operativnom planu aktivnosti na gašenju požara, primati u radni odnos na određeno vrijeme koje ne

može biti duže od pet mjeseci, dobrovoljne vatrogasce ili druga lica koja imaju položen ispit vatrogasca ili položen ispit dobrovoljnog vatrogasca koji ispunjavaju uvjete iz Federalnog zakona, a raspoređuje ih u profesionalnu vatrogasnu jedinicu.

- (2) Kantonalna uprava civilne zaštite i općinske službe civilne zaštite mogu izvršiti prijem u radni odnos na određeno vrijeme, najdalje do 12 mjeseci ukupno, za vrijeme proglašenja stanja prirodne ili druge nesreće ili epidemije zarazne bolesti u Federaciji, kao i za vrijeme vanrednog stanja u Federaciji, proglašenog od strane nadležnih institucija, za konkretno radno mjesto, a sve u skladu sa Uredbom o postupku prijema u radni odnos u zavodima, agencijama, direkcijama i upravnim organizacijama, pravnim licima sa javnim ovlaštenjima na teritoriji kantona, grada ili općine, u javnim ustanovama i javnim preduzećima čiji su osnivači Kanton, grad, ili općina, te u privrednim društvima u kojima Kanton, grad ili općina učestvuje sa više od 50% ukupnog kapitala ("Službene novine Bosansko-podrinjskog kantona Goražde", broj: 8/19 i 4/20).
- (3) Prijem lica u radni odnos na određeno vrijeme prema stavu (1) i (2) ovog člana, vrši se bez objavljivanja javnog oglasa.

#### **Član 36. (Pasivno dežurstvo)**

- (1) Za vrijeme provedeno na pasivnom dežurstvu (pripravnost za rad), stariješini vatrogasne jedinice i vatrogascu ili drugom licu, pripada 15% naknade od osnovne plaće za svaki sat pasivnog dežurstva.

- (2) Evidenciju o vremenu pasivnog dežurstva iz stava (1) ovog člana dužan je voditi starješina profesionalne vatrogasne jedinice.

#### **Član 37. (Stož osiguranja)**

- (1) Profesionalnom vatrogascu i starješini vatrogasne jedinice koji vrše operativne poslove vatrogastva, staž osiguranja računa se u uvećanom trajanju od 15 mjeseci za 12 mjeseci efektivno provedenih na tim poslovima.
- (2) Poslovi iz stava (1) ovog člana na kojima se priznaje uvećani staž i način uplate doprinosa za taj staž, uređuje se propisom iz člana 158. stav (1) tačka 4) Federalnog zakona.
- (3) Lica iz stava (1) ovog člana imaju kolektivno osiguranje od posljedica nesretnog slučaja za vrijeme obavljanja službenih poslova ili u vezi sa obavljanjem službenih poslova.

#### **Član 38. (Plaće i naknade)**

- (1) Zbog posebnih uvjeta rada, težine i prirode posla i odgovornosti za obavljanje poslova vatrogastva iz člana 61. ovog Zakona, visina sredstava za plaće stariješine profesionalne vatrogasne jedinice, njihove zamjenike i vatrogasce u profesionalnoj vatrogasnoj jedinici organa uprave civilne zaštite općine i Kantona, kao i za inspektore iz člana 136. stav (1) i člana 139. stav (2) ovog Zakona, određuju se kao za državne službenike i namještenike, uvećana za 30%, a ostali službenici i namještenici na poslovima u profesionalnim vatrogasnim jedinicama imaju dodatak na plaću do 20%.

- (2) Radna mjesta iz stava (1) ovog člana za koja pripada uvećenje plaće za 30%, odnosno do 20%, utvrđuju se u pravilniku o plaćama i naknadama organa uprave civilne zaštite općine i Kantona, a prema radnim mjestima koja su za profesionalnu vatrogasnu jedinicu utvrđena u pravilniku o unutrašnjoj organizaciji tih organa.

#### **Član 39.**

##### **(Planski dokumenti u općini/gradu)**

- (1) Općina/grad, u okviru programa razvoja zaštite i spašavanja od prirodnih i drugih nesreća općine/grada, programira razvoj zaštite od požara i vatrogastvo na period od najmanje pet godina.
- (2) Osnov za izradu programa iz stava (1) ovog člana je procjena ugroženosti od požara na području općine/grada, koja je sastavni dio procjene ugroženosti od prirodnih i drugih nesreća u općini.
- (3) Općina/grad je obavezna donijeti plan zaštite od požara općine/grada, u kojem se utvrđuje organizacija i funkcionisanje zaštite od požara u općini, što je propisano i definisano Federalnim zakonom.
- (4) U planu zaštite od požara općine/grada određuju se pravna lica koja su dužna osnovati vatrogasnu jedinicu ili na drugi način osigurati zaštitu od požara, pod uvjetima utvrđenim Federalnim zakonom.
- (5) Plan zaštite od požara za vlastite potrebe izrađuju općinski/gradski organi i druge institucije, određeni u planu zaštite od požara općine/grada, u skladu sa federalnim propisom

kojim se građevine tih organa razvrstavaju u odgovarajuću kategoriju ugroženosti od požara.

#### **Član 40.**

##### **(Informacioni sistem za zaštitu od požara)**

- (1) Općina/grad je obavezna, u okviru općinskog/gradskog operativnog centra, organizirati funkcionalni dio informacionog sistema za zaštitu od požara i vatrogastvo, u skladu sa podzakonskim propisom o tim centrima, donesenim na osnovu Zakona o zaštiti i spašavanju ljudi i materijalnih dobara od prirodnih i drugih nesreća, te drugim federalnim propisima.

#### **Član 41.**

##### **(Opći akt u pravnim licima i drugim institucijama)**

- (1) Pravna lica i druge institucije na području općine/grada dužni su donijeti svoj opći akt, u kojem će urediti pitanja koja se odnose na organizaciju i funkcionisanje zaštite od požara u svojim objektima i prostorima, na način utvrđen u članu 24. stav (1) Federalnog zakona i ovog Zakona.
- (2) Plan zaštite od požara za vlastite potrebe donose pravna lica, koja su određena u Planu zaštite od požara općine/grada ili Kantona, u skladu sa federalnim propisom kojim su građevine pravnih lica razvrstane u odgovarajuću kategoriju ugroženosti od požara. Način izrade i sadržaj ovog plana utvrđen je propisom Vlade Federacije.



**POGLAVLJE V - FINANSIRANJE  
ZAŠTITE OD POŽARA I  
VATROGASTVA**

**Član 42.**

**(Finansiranje zaštite od požara)**

- (1) Finansijska sredstva potrebna za organiziranje, provođenje i unapređenje mjera zaštite od požara predviđenih ovim Zakonom, kao i obučavanje i osposobljavanje zaposlenih lica, planiraju i osiguravaju pravna lica, organi uprave i druge institucije svaki za svoje građevine i prostore i zaposlena lica.
- (2) Finansijska sredstva za potrebe iz stava (1) ovog člana planiraju se i osiguravaju svake godine u okviru finansijskog plana pravnog lica, organa uprave i druge institucije, u okviru sredstava za obavljanje njihove redovne djelatnosti.

**Član 43.**

**(Finansiranje vatrogastva)**

Vatrogasna djelatnost na nivou Kantona predviđena ovim Zakonom finansira se iz:

- a) budžeta Kantona i općine/ grada;
- b) sredstava pravnih lica i vatrogasnih društava;
- c) premija osiguranja;
- d) dobrovoljnih priloga ili poklona pravnih i fizičkih lica;
- e) međunarodne pomoći;
- f) drugih izvora utvrđenih ovim i drugim zakonom.

**Član 44.**

**(Finansiranje iz Budžeta Kantona)**

- (1) Kanton finansira:

- a) obavljanje poslova zaštite od požara i vatrogastva iz odredaba ovog Zakona koji su u nadležnosti Kantona i Kantonalne uprave civilne zaštite;
- b) organiziranje, pripremanje, materijalno opremanje, obuku i osposobljavanje i usavršavanje i rad zajedničke profesionalne vatrogasne jedinice koju osniva Kanton;
- c) pružanje materijalne pomoći općinama/ gradu za finansiranje profesionalnih vatrogasnih jedinica koje osnivaju općine/ grad;
- d) učešće u saniranju posljedica na području Kantona koje su nastale požarom, poduzeto radi stvaranja uvjeta za život ljudi na području nastradalom požarom;
- e) istraživačke i razvojne projekte od značaja za zaštitu od požara i vatrogastvo iz nadležnosti Kantona;
- f) naknade za učešće profesionalnih vatrogasnih jedinica općina u slučaju pružanja pomoći drugim općinama u gašenju požara koje angažira Kantonalni štab civilne zaštite;
- g) organiziranje i provođenje stručne obuke i osposobljavanja vatrogasaca i drugih lica za obavljanje vatrogasne djelatnosti iz nadležnosti Kantona;
- h) pružanje pomoći dobrovoljnim vatrogasnim društvima osnovanim na području Kantona za finansiranje određenih poslova iz njihove nadležnosti od značaja za zaštitu od požara i vatrogastvo, a posebno za finansiranje dobrovoljnih vatrogasnih jedinica osnovanih u tim društvima;

- i) naknade plaće i druge naknade predviđene ovim Zakonom za građane i lica u radnom odnosu za njihovo učešće u gašenju požara i spašavanju ljudi i materijalnih dobara, kao i naknade za korištenje njihovih prevoznih, tehničkih i drugih sredstava i opreme koja se koriste u gašenju požara po naredbi Kantonalnog štaba civilne zaštite;
  - j) učešće u sufinansiranju jedinice za zračni transport i gašenje požara na nivou Federacije, u skladu sa sporazumom Vlade Federacije i vlada kantona;
  - k) druge potrebe u oblasti zaštite od požara i vatrogasne djelatnosti iz nadležnosti Kantona.
- (2) Finansijska sredstva za finansiranje zadataka iz stava (1) ovog člana planiraju se i osiguravaju u Budžetu Kantona na prijedlog Kantonalne uprave civilne zaštite.

#### **Član 45.**

##### **(Finansiranje iz sredstava pravnih lica)**

- (1) Pravna lica koja su dužna, a nisu osnovala sopstvenu dobrovoljnu ili profesionalnu vatrogasnu jedinicu, mogu sa općinom/gradom ili Kantonalnom upravom civilne zaštite zaključiti ugovor za finansiranje dodatnih snaga i sredstava profesionalne vatrogasne jedinice općine/grada ili zajedničke vatrogasne jedinice Kantona, sa gledišta potrebnog broja vatrogasaca i odgovarajuće vatrogasne opreme, vozila, tehničkih i drugih sredstava da bi ta jedinica mogla efikasno gasiti požar u pravnom licu.
- (2) Finansijska sredstva za finansiranje zadataka iz stava (1) ovog člana pla-

niraju se i osiguravaju u Budžetu Kantona na prijedlog Kantonalne uprave civilne zaštite.

#### **Član 46.**

##### **(Finansiranje dobrovoljnih vatrogasnih društava)**

Dobrovoljna vatrogasna društava finansiraju se iz sredstava koja osiguravaju osnivači društva, sredstava donacija i drugih vrsta pomoći fizičkih i pravnih lica, kao i sredstava koja se za njihove aktivnosti osiguraju u budžetu Kantona i općine/grada.

#### **Član 47.**

##### **(Finansiranje vatrogasnih saveza)**

Vatrogasni savezi finansiraju se članarinom svojih članova, donacijama i drugim vrstama pomoći pravnih i fizičkih lica, kao i sredstvima koja se za aktivnosti saveza osiguraju u budžetu Kantona i općine/grada.

#### **Član 48.**

##### **(Finansiranje vatrogasnih jedinica pravnih lica)**

Vatrogasne jedinice koje osnivaju pravna lica za svoje potrebe finansiraju se iz sredstava koja osigurava pravno lice u okviru sredstava za ostvarivanje svoje redovne djelatnosti.

#### **Član 49.**

##### **(Finansiranje iz premija osiguranja)**

- (1) Društva za osiguranje i druga pravna lica koja se bave osiguranjem imovine pravnih i fizičkih lica, dužna su izdvajati finansijska sredstva iz premije osiguranja imovine od po-

- žara i prirodnih sila u iznosu od 6%, a 1% sredstava od naplaćene funkcionalne premije osiguranja, koja se odnosi na osiguranje motornih vozila.
- (2) Sredstva iz stava (1) ovog člana uplaćuju se na poseban račun Budžeta (trezora) Kantona, a vode se na posebnom jedinstvenom transakcijskom računu budžeta Federacije, Kantona i općine/grada. Ta sredstva se raspodjeljuju tako što 10% pripada Federaciji, 20% Kantonu, od čega 4% za dobrovoljne vatrogasne jedinice formirane u dobrovoljnim vatrogasnim društvima na nivou Kantona i 70% općini, od čega 6% za dobrovoljne vatrogasne jedinice formirane u dobrovoljnim vatrogasnim društvima u općini, u kojoj su ta sredstva ostvarena.
- (3) Izuzetno, ako je u Kantonu formirana zajednička profesionalna vatrogasna jedinica za potrebe svih ili pojedinih općina na području Kantona, sredstva iz stava (1) ovog člana raspoređuju se tako što 5% pripada Federaciji, a Kantonu 95%, od čega 10% za formirane dobrovoljne vatrogasne jedinice u dobrovoljnim vatrogasnim društvima na nivou Kantona, s tim da se ova odredba ne odnosi na općine/grad koje nisu obuhvaćene zajedničkom vatrogasnom jedinicom.
- (4) Sredstva na transakcijskom računu iz stava (2) ovog člana, koja nisu potrošena, ne gase se istekom kalendarske (fiskalne) godine, već se akumuliraju sa sredstvima koja se prikupljaju u toku naredne godine.
- (5) Sredstva iz stavova (2) i (3) ovog člana mogu se koristiti samo za nabavku vatrogasne opreme, tehničkih i drugih sredstava za vatrogasne jedinice, stručno obučavanje i osposobljavanje vatrogasaca i održavanje opreme i vatrogasnih sredstava te investiciju u izgradnju i opremanje objekata za potrebe vatrogasnih jedinica.
- (6) Uvjete, prioritete i način korištenja sredstava iz stavova (2) i (3) za namjene iz stava (5) ovog člana, utvrđuju:
- a) za sredstva Kantona - Vlada Kantona, na prijedlog Kantonalne uprave civilne zaštite;
  - b) za sredstva općine/grada - općinski načelnik/gradonačelnik, na prijedlog službe civilne zaštite općine/grada.
- (7) Kontrolu uplate sredstava iz stava (1) ovog člana vrše nadležni organi i službe iz člana 137. stav (7) Federalnog zakona.

#### Član 50.

##### (Finansiranje iz drugih izvora)

- (1) Grad/općina može donijeti odluku o taksama, odnosno naknadama za vatrogastvo, kao drugi izvor finansiranja, u skladu sa članom 8. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09).
- (2) Obveznici, visina naknade, odnosno takse i način prikupljanja iz stava (1) ovog člana, kao i druga pitanja utvrđuju se posebnom odlukom općinskog/gradskog vijeća.
- (3) Pravna lica koja formiraju vlastitu profesionalnu vatrogasnu jedinicu isključuju se od obaveze plaćanja naknade iz stava (1) ovog člana.
- (4) Sredstva iz stava (1) ovog člana mogu se koristiti isključivo za nabavku

vatrogasne opreme, tehničkih i drugih sredstava za vatrogasne jedinice, stručno obučavanje i osposobljavanje vatrogasaca, održavanje opreme i vatrogasnih sredstava, te za investicijsku izgradnju i opremanje objekata za potrebe vatrogasnih jedinica.

- (5) Uvjete, prioritet i način korištenja sredstava iz stava (1), a u slučajevima iz stava (4) ovog člana, utvrđuje gradonačelnik ili općinski načelnik, na prijedlog službe civilne zaštite grada ili općine.
- (6) Sredstva prikupljena na način utvrđen ovim članom uplaćuje se na poseban račun budžeta grada ili općine, s tim da se ista ne gase istekom kalendarske godine, već se akumuliraju sa sredstvima koja se prikupljaju u toku naredne godine za iste namjene.

#### **POGLAVLJE VI - UPRAVNI NADZOR NAD PROVOĐENJEM OVOG ZAKONA**

##### **Član 51.**

##### **(Upravni nadzor u Kantonalnoj upravi)**

- 1) Kantonalna uprava vrši upravni nadzor u odnosu na pitanja koja su Federalnim i ovim Zakonom stavljena u njenu nadležnost.
- 2) Nadzor se ostvaruje u kantonalnim organima uprave, općinskim službama za upravu i pravnim licima na području Kantona, u dijelu koji se odnosi na zakonitost, poduzete aktivnosti i mjere u oblasti zaštite od požara i vatrogasne djelatnosti, prema Federalnom zakonu i ovom Zakonu.
- 3) Upravni nadzor obuhvata uvid i kontrolu zadataka i aktivnosti koje se odnose na provođenje mj-

era zaštite od požara, pregled akata i dokumentacije iz oblasti zaštite od požara i vatrogastva, pružanje stručne pomoći davanjem stručnih objašnjenja i uputa za rad na upite pravnih lica, organa uprave i drugih institucija ili na drugi način, traženje podataka i obavještenja o obavljanju poslova zaštite od požara, odnosno provođenja vatrogasne djelatnosti, poduzimanje odgovarajućih mjera na pravilnom postupanju u primjeni ovog Zakona, kao i rješavanje u prvostepenom upravnom postupku u slučajevima predviđenim ovim Zakonom.

- 4) Pravna lica, državni organi i druge institucije dužni su dostaviti podatke i dokumentaciju koju traži organ iz stava (1) ovog člana.

##### **Član 52.**

##### **(Predmet upravnog nadzora)**

Upravni nadzor iz člana 51. ovog Zakona odnosi se na nadzor nad zakonitošću poduzetih aktivnosti i mjera u oblasti zaštite od požara i vatrogasne djelatnosti, prema ovom Zakonu.

#### **POGLAVLJE VII - INSPEKCIJA ZA ZAŠTITU OD POŽARA I VATROGASTVO**

##### **Odjeljak A. Inspekcijski nadzor zaštite od požara i vatrogastvo iz nadležnosti Kantonalne uprave civilne zaštite**

##### **Član 53.**

##### **(Inspekcijski nadzor u Kantonalnoj upravi)**

- (1) Kantonalna uprava, u okviru svoje nadležnosti, vrši poslove inspekcij-

skog nadzora u oblasti zaštite od požara i u oblasti vatrogastva, prema subjektima i u pitanjima utvrđenim zakonom.

- (2) Poslove inspekcijskog nadzora iz stava (1) ovog člana vrše kantonalni inspektor za zaštitu od požara i kantonalni inspektor za vatrogastvo.
- (3) Uvjete koje moraju ispunjavati inspektori iz stava (2) ovog člana, način vršenja inspekcijskog nadzora, mjere koje mogu izreći u toku nadzora, pravni lijek, organ za drugostepeno odlučivanje i druga pitanja, utvrđeni su zakonom i podzakonskim propisima.

#### **Član 54.**

##### **(Organizacija inspekcijskog nadzora)**

- (1) Organizaciono ustrojstvo inspekcijskog nadzora u Kantonalnoj upravi bliže će se definisati pravilnikom o unutrašnjoj organizaciji Uprave.

#### **Član 55.**

##### **(Nadležnost kantonalne inspekcije iz Kantonalne uprave civilne zaštite)**

- (1) Kantonalni inspektori za zaštitu od požara i kantonalni inspektori za vatrogastvo iz Kantonalne uprave civilne zaštite, u okviru svoje nadležnosti u oblasti zaštite od požara i vatrogastva, vrše inspekcijski nadzor u oblasti zaštite od požara i vatrogastva u općinama i svim pravnim licima od značaja za Kanton i općinu, a koja su utvrđena u odredbama stavova (2) i (3) ovog člana.
- (2) U oblasti zaštite od požara inspekcijski nadzor odnosi se na sljedeća pitanja:
  - a) organiziranje i provođenje zašti-

te od požara u organima uprave, pravnim licima i drugim institucijama u skladu sa ovim Zakonom i podzakonskim propisima donesenim na osnovu ovog Zakona i Federalnog zakona;

- b) vršenje poslova iz nadležnosti općinske službe civilne zaštite iz člana 17. Federalnog zakona;
- c) programiranje razvoja zaštite od požara, u skladu sa odredbom člana 17. ovog Zakona i člana 19. Federalnog zakona;
- d) donošenje planova zaštite od požara općina i pravnih lica od značaja za općinu i Kanton u skladu sa odredbama članova 21. i 22. Federalnog zakona;
- e) opće akte za organizovanje i funkcionisanje zaštite od požara u državnim organima i pravnim licima od značaja za općinu i Kanton;
- f) dostavljanje podataka operativnim centrima civilne zaštite općine i Kantona u skladu sa odredbama člana 40. ovog Zakona;
- g) provođenje statističkih istraživanja iz oblasti zaštite od požara iz nadležnosti općine i Kantona;
- h) planiranje i osiguranje finansijskih sredstava za potrebe iz člana 42. ovog Zakona u kantonalnim i drugim organima uprave, općini i pravnim licima od značaja općinu i Kanton;
- i) provođenje obuke i osposobljavanja zaposlenih lica za provođenje mjera zaštite od požara na radnim mjestima na kojima se nalaze u kantonalnim i drugim organima uprave, općine, pravnim licima od značaja za općinu i Kanton.

- j) donošenje propisa kojim se uređuje organizacija i funkcionisanje zaštite od požara i vatrogastva na području općine i njihova usklađenost sa ovim Zakonom.
- (3) U oblasti vatrogastva inspekcijski nadzor se vrši u odnosu na sljedeća pitanja:
- a) nadzor nad provođenjem onih mjera zaštite od požara koje su od značaja za efikasno izvršenje vatrogasne intervencije, a što se odnosi naročito na sljedeća pitanja: ispravnost i funkcionalnost vodozahvata, hidranata, aparata za gašenje požara, odlaganje zapaljivih tekućina, gasova i drugih zapaljivih materija u podrumima, tavanima i drugim mjestima gdje predstavljaju opasnost, prohodnost požarnih puteva i prilaza elektrorazvodnim tablama, hidrantima, aparatima, blokadnim ventilima gasnih instalacija i slično, provođenje zabrane korištenja otvorenog plamena i pušenja na mjestima sa povećanom opasnošću od pojave požara;
  - b) lične i materijalne formacije vatrogasnih jedinica općine i grada i popunjenost tih jedinica vatrogascima koji ispunjavaju propisane uvjete, pravilnost čuvanja tehničkih sredstava i vatrogasne opreme i njeno održavanje u ispravnom stanju i provođenje obuke i stručnog osposobljavanja i usavršavanja vatrogasaca tih jedinica prema utvrđenim planovima i programima obuke;
  - c) vođenje propisane evidencije i pravilnost postavljanja komandira jedinica na način predviđen Federalnim zakonom;
  - d) vođenje evidencija;
  - e) osnivanje vatrogasnih jedinica u pravnim licima prema odredbama Federalnog zakona;
  - f) vršenje poslova zaštite od požara i vatrogastva iz nadležnosti dobrovoljnih vatrogasnih društava u skladu sa odredbama Federalnog zakona;
  - g) usklađenost općih akata vatrogasnih društava i njihovih saveza sa odredbama Federalnog zakona i drugim zakonskim propisima koji regulišu ovu oblast;
  - h) primanje vatrogasca pripravnika na pripravnički staž u skladu sa odredbom Federalnog zakona;
  - i) rješavanje zahtjeva građana i drugih lica u vezi sa ostvarivanjem naknada u skladu sa odredbama Federalnog zakona;
  - j) organiziranje i provođenje stručnog osposobljavanja i usavršavanja dobrovoljnih vatrogasaca u skladu sa odredbama Federalnog zakona.
- Član 56.**  
**(Inspektori Kantonalne uprave civilne zaštite)**
- (1) Poslove inspekcijskog nadzora iz člana 55. ovog Zakona iz oblasti zaštite od požara i vatrogastva obavljaju kantonalni inspektor zaštite od požara i kantonalni inspektor za vatrogastvo, koji imaju prava i dužnosti inspektora utvrđena u Zakonu o organizaciji organa uprave u Federaciji Bosne i Hercegovine („Službene novine Federacije BiH“, broj: 35/05) i članom 10. Zakona o Kantonalnoj

upravi za civilnu zaštitu Bosansko-podrinjskog kantona Goražde („Službene novine Bosansko-podrinjskog kantona Goražde”, broj: 7/21).

- (2) Inspekcijski nadzor se provodi po pravilima Zakona o upravnom postupku („Službene novine Federacije BiH,” broj: 2/98 i 48/99).
- (3) Kantonalni inspektori iz stava (1) ovog člana mogu biti lica koja imaju najmanje visoku stručnu spremu, VII stepen, iz oblasti zaštite od požara, sigurnosti i tehničkih struka koje su utvrđene u propisu iz člana 159. tačka 1. Federalnog zakona i najmanje pet godina radnog staža, s tim da inspektor za vatrogastvo mora imati položen i ispit za rukovodioca akcije gašenja požara.

**Član 57.**  
**(Rješenja inspektora Kantonalne uprave civilne zaštite)**

- (1) Sve mjere koje kantonalni inspektor za zaštitu od požara i inspektor za vatrogastvo naređuje pri vršenju inspekcijskog nadzora vrše se rješenjem.
- (2) Kantonalni inspektor za vatrogastvo, pri vršenju inspekcijskog nadzora iz člana 55. stava (3) ovog Zakona, može narediti svaku mjeru kojom se može otkloniti ili spriječiti nastanak negativnih posljedica i kojom se osigurava postupanje u tim pitanjima na način predviđen zakonom.
- (3) Protiv rješenja kantonalnog inspektora može se izjaviti žalba u roku od osam dana od dana prijema rješenja.
- (4) Žalba se izjavljuje Vladi Bosansko-podrinjskog kantona Goražde, koja će u postupku rješavanja po žalbi fo-

rmirati radno tijelo ili komisiju, koja će predložiti Vladi Bosansko-podrinjskog kantona Goražde prijedlog rješenja o žalbi, ako je rješenje doneseno na osnovu ovog Zakona i propisa donesenih na osnovu ovog Zakona.

- (5) Rješenje doneseno po žalbi iz stava (3) ovog člana je konačno i protiv njega se može pokrenuti upravni spor kod nadležnog suda u roku od 30 dana od dana prijema rješenja.
- (6) Pravna lica, državni organi i druge institucije iz člana 55. ovog Zakona, kod kojih se vrši inspekcijski nadzor, dužna su postupiti po rješenju kantonalnog inspektora.

**Odjeljak B. Inspekcijski nadzor zaštite od požara iz nadležnosti Ministarstva za unutrašnje poslove Bosansko-podrinjskog kantona Goražde**

**Član 58.**  
**(Inspekcijski nadzor u Kantonalnom ministarstvu za unutrašnje poslove)**

- (1) Kantonalno ministarstvo za unutrašnje poslove, u okviru svoje nadležnosti, vrši poslove inspekcijskog nadzora nad provođenjem mjera zaštite od požara, kao i nad provođenjem propisa o tehničkim normativima i standardima koji se odnose na zaštitu od požara, prema subjektima i u pitanjima utvrđenim Federalnim zakonom.
- (2) Poslove inspekcijskog nadzora iz stava (1) ovog člana vrši kantonalni inspektor za zaštitu od požara.
- (3) Uvjeti koje mora ispunjavati lice za postavljenje na mjesto inspektora iz stava (2) ovog člana, način vršenja inspekcijskog nadzora, mjere koje se

mogu izreći u toku nadzora, pravni lijek, organ za drugostepeno odlučivanje i druga pitanja, utvrđeni su Federalnim zakonom i podzakonskim propisima, koji se odnose na taj zakon, te pravilima tehničke struke.

- (4) U vršenju svog posla, inspektori za zaštitu od požara iz stava (2) ovog člana obavezni su ostvariti saradnju sa inspektorima Kantonalne uprave, u svim slučajevima kada to zahtijeva zajednički interes u rješavanju pitanja iz oblasti zaštite od požara.

#### **Član 59.**

##### **(Organizacija inspekcijskog nadzora)**

- (1) Organizaciono ustrojstvo inspekcijskog nadzora u Kantonalnom ministarstvu za unutrašnje poslove bliže će se definisati pravilnikom o unutrašnjoj organizaciji Ministarstva.

#### **Član 60.**

##### **(Nadležnost inspekcije Ministarstva za unutrašnje poslove)**

- (1) Ministarstvo za unutrašnje poslove vrši inspekcijski nadzor nad provođenjem mjera zaštite od požara:
- a) u skladištima eksplozivnih materija za upotrebu u privredi;
  - b) u objektima i postrojenjima za proizvodnju energije nazivne snage do 35 MW;
  - c) u skladištima zapaljivih tečnosti kapaciteta do 1000 m<sup>3</sup>;
  - d) u skladištima zapaljivih gasova u bocama kapaciteta do 5000 kg;
  - e) skladištima zapaljivih gasova kapaciteta do 30 m<sup>3</sup>;
  - f) u objektima hemijske, tekstilne i drvene industrije i drugim industrijskim objektima na području

Kantona;

- g) u trgovinskom prometu pirotehničkih sredstava;
  - h) u pravnim licima i organima uprave i drugim institucijama kojima je povjereno na upravljanje područje prirodnog i kulturno-historijskog naslijeđa od značaja za Kanton i općinu;
  - i) u organima uprave i drugim institucijama koje se bave poslovima arhive i arhivske građe iz nadležnosti Kantona i općina;
  - j) u objektima masovnog okupljanja građana (koncertne dvorane, stadioni, sportske dvorane itd.);
  - k) u objektima u vlasništvu Kantona i općina/grada;
  - l) u objektima fizičkih lica i objektima pravnih lica u državnom ili privatnom vlasništvu koji nisu u kategoriji industrijskih objekata;
  - m) saraduje u akcijama policije vezanim za kontrolu prometa eksplozivnih i drugih opasnih materija iz nadležnosti Kantona;
  - n) učestvuje u radu operativnih ekipa na razjašnjenju uzroka i utvrđivanju odgovornosti za nastanak požara, eksplozija i havarija, te akcidenata sa opasnim materijama u nadležnosti Ministarstva za unutrašnje poslove Bosansko-podrinjskog kantona Goražde.
- (2) Poslove inspekcijskog nadzora iz nadležnosti Ministarstva za unutrašnje poslove vrše kantonalni inspektori za zaštitu od požara (u daljem tekstu: inspektori).
- (3) Inspektor iz stava (2) ovog člana može biti lice koje ispunjava uvjete predviđene za inspektore iz člana 56. stav (3) ovog Zakona.



- (4) Sadržaj i način vršenja poslova inspeksijskog nadzora iz stava (1) ovog člana utvrđuje se propisom iz člana 164. tačka 4) Federalnog zakona.

#### **Član 61.**

##### **(Postupanje inspektora Ministarstva za unutrašnje poslove)**

- (1) Inspektori iz člana 60. stav (2) ovog Zakona pri obavljanju inspeksijskih poslova imaju prava i dužnosti inspektora utvrđena u Zakonu o organizaciji organa uprave u Federaciji Bosne i Hercegovine, koji je naveden u članu 56. stav (1) ovog Zakona, a inspeksijski nadzor vrše u skladu sa ovim Zakonom i propisima i pravilima tehničke struke.
- (2) U cilju sprečavanja izbijanja i širenja požara, inspektori mogu narediti da se poduzmu sljedeće mjere:
- a) izvrši ispitivanje ispravnosti i funkcionalnosti postrojenja, instalacija ili uređaja od kojih prijeti opasnost za izbijanje požara, ili su u funkciji zaštite od požara, gašenja i sprečavanja širenja požara;
  - b) dovedu u ispravno stanje ili da se preurede, premjeste odnosno demontiraju postrojenja, instalacije ili uređaji od kojih prijeti opasnost za izbijanje požara;
  - c) dovedu u ispravno i funkcionalno stanje postrojenja, instalacije ili uređaje koji su u funkciji zaštite od požara, gašenja i sprečavanja širenja požara;
  - d) izvrši popravka, rekonstrukcija, dogradnja i pregradnja na objektima u svrhu sprečavanja izbijanja i širenja požara ili spašavanja ljudi i materijalnih dobara;
  - e) zabrani upotreba objekata ili postrojenja, uređaja i instalacija ako se njihovim preuređenjem ili drugim mjerama ne može otkloniti opasnost od požara po ljude i tuđa materijalna dobra;
  - f) izvrši uklanjanje građevinskih i drugih fizičkih prepreka, predmeta i materijala koji bi u slučaju izbijanja požara predstavljali smetnju za brzu i efikasnu evakuaciju ljudi i gašenje požara, ili bi svojim izgledom ili funkcijom mogli dovesti u zabludu ljude koji se evakušu;
  - g) izvrši uklanjanje zapaljivih materijala koji su ugrađeni u konstruktivne elemente građevine, ili su upotrebljeni za horizontalne i vertikalne površine evakuacionih puteva, ako ti materijali predstavljaju opasnost za nastanak i širenje požara ili u požaru razvijaju otrovne gasove ili preveliku količinu dima;
  - h) izvrši uklanjanje i čišćenje otpadnih materija i prašine sa mjesta na kojima pogoduju izbijanju i širenju požara;
  - i) zabrani upotrebu otvorenog plamena, iskrenja i žara, uključujući i uređaje koji ih mogu stvarati, na mjestima na kojima bi mogli izazvati požar;
  - j) zabrani upotrebu ili držanje lako zapaljivih tečnosti i gasova, kao i posebno zapaljivih čvrstih materija, ako se koriste na način koji nije siguran ili se drže na neuvjetnim mjestima ili mjestima na kojima predstavljaju opasnost po okolinu;
  - k) poduzmu zaštitne mjere protiv namjernog ili slučajnog ubaciva-

- nja predmeta u objekte i prostore gdje bi mogli izazvati požar;
- l) izvrši obilježavanje požarnih puteva i puteva evakuacije, postave odgovarajući znaci, natpisi i uputstva, izvede sigurnosna i panik rasvjeta;
  - m) izvedu propisni izlazi iz objekata radi omogućavanja brzog izlaska ljudi u slučaju požara;
  - n) osigura stalni nadzor nad mjestima gdje su smještene zapaljive i eksplozivne materije;
  - o) osigura stalno, povremeno ili privremeno vatrogasno ili protivpožarno dežurstvo u građevinama ili vanjskom prostoru;
  - p) osigura stabilne, polustabilne, mobilne i druge odgovarajuće instalacije i uređaje za gašenje požara, kao i instalacije za dojavu požara i druge instalacije i uređaje sa zaštitnim i kontrolnim djelovanjem u funkciji zaštite ljudi i materijalnih dobara;
  - q) zabrani dalje izvođenje radova dok izvođač radova ne poduzme potrebne mjere za sprečavanje izbijanja širenja požara i ne osigura potrebna sredstva i opremu za gašenje požara;
  - r) otklone nedostaci u projektnoj dokumentaciji koja nije u skladu sa propisima, standardima i drugim normativima u funkciji zaštite od požara, a prema potrebi i da zabrani dalje izvođenje radova dok se navedeni propusti ne otklone i
  - s) naredi poduzimanje drugih mjera propisanih tehničkim propisima, radi sprečavanja izbijanja i širenja požara.

- (3) Prije određivanja mjera iz tački od a) do e) stava (2) ovog člana, inspektor može odrediti stručni komisijski pregled objekta i postrojenja, ako ocijeni da je taj pregled neophodan.
- (4) Nadležni inspektor vrši privremeno inspeksijski nadzor iz člana 55. ovog Zakona, do postavljenja kantonalnog inspektora za zaštitu od požara i kantonalnog inspektora za vatrogastvo iz Kantonalne uprave civilne zaštite.

### **Član 62.**

#### **(Ovlaštenja inspektora)**

- (1) Pri vršenju inspeksijskog nadzora, inspektor ima sljedeća ovlaštenja:
  - a) pregledati sve zatvorene prostore i otvorene prostore, postrojenja i uređaje, te poduzeti druge radnje potrebne za utvrđivanje primjene propisanih i naređenih mjera zaštite od požara;
  - b) može ući u stan na traženje stana ili radi otklanjanja ozbiljne neposredne opasnosti od požara po život i zdravlje ljudi ili materijalnih dobara većeg obima.
- (2) Pravno lice i drugi korisnici ili vlasnici građevina dužni su omogućiti inspektorima obavljanje inspeksijskog nadzora i na njegovo traženje pružiti potrebne podatke, dokumente i obavještenja.

### **Član 63.**

#### **(Mjere u slučajevima neposredne opasnosti od nastanka požara ili eksplozije)**

- (1) Ako postoji neposredna opasnost od nastanka požara ili eksplozije i ako je ugrožen život i zdravlje ljudi i nji-

hova materijalna dobra te ako drugim mjerama nije moguće otkloniti opasnost, inspektor će svojim rješenjem ograničiti ili zabraniti:

- a) rad u građevini ili rad pojedinog uređaja;
- b) upotrebu zapaljivih, eksplozivnih i drugih opasnih materija, tehnoloških postupaka ili proizvoda;
- c) obavljanje pojedinih djelatnosti ili poslova.

### **Odjeljak C. Inspekcijski nadzor zaštite od požara u šumama, na poljoprivrednom zemljištu i okolini**

#### **Član 64.**

#### **(Inspekcijski nadzor zaštite od požara u šumama, na poljoprivrednom zemljištu i okolišu)**

- (1) Inspekcijski nadzor nad provođenjem mjera zaštite od požara u šumama i na šumskom zemljištu, poljoprivrednom zemljištu i okolišu vrše kantonalni šumarski inspektor, kantonalni poljoprivredni inspektor i inspektor zaštite okoline, u skladu sa zakonskim propisima koji regulišu predmetnu oblast.
- (2) Kantonalni inspektori iz stava (1) ovog člana, pri vršenju tog inspekciskog nadzora, imaju ovlaštenja inspektora utvrđena u propisima koji se odnose na te inspekcije.

### **POGLAVLJE VIII - KAZNENE ODREDBE**

#### **Član 65.**

- (1) Novčanom kaznom od 5.000,00 KM

do 15.000,00 KM kaznit će se za prekršaj pravno lice:

- a) ako ne organizira i ne provodi zaštitu od požara u smislu člana 5. stav (2);
- b) ako ne izvršava zadatke utvrđene u planu zaštite od požara u smislu člana 5.
- c) ako ne organizuje i sprovodi zaštitu od požara u šumama i na šumskom i poljoprivrednom zemljištu u skladu sa članom 5. stav (3);
- d) ako ne donese opći akt iz člana 41. stav (1);
- e) ako ne donese plan zaštite od požara iz članova 11, 13, 39. i 41;
- f) ako ne osnuje vatrogasnu jedinicu prema odredbi člana 33.

- (2) Za prekršaj iz stavka (1) ovog člana kaznit će se i odgovorno lice u pravnom licu novčanom kaznom od 1.000,00 KM do 2.500,00 KM.

#### **Član 66.**

Novčanom kaznom od 1.000,00 KM do 2.500,00 KM kaznit će se za prekršaj rukovodilac ili drugo odgovorno lice organa uprave i upravne organizacije i druge kantonalne, odnosno općinske / gradske institucije:

- a) ako ne organizira i ne provodi zaštitu od požara u smislu člana 5. stav (2);
- b) ako ne donese plan zaštite od požara iz članova 11, 13. i 39,
- c) ako ne donese opći akt iz člana 13;
- d) ako ne postupi u smislu člana 13. stav (2) točke a), b), c), f) i g);
- e) ako ne uredi svojim općim akt-

- om pitanja iz člana 13. stav (1);
- f) ako ne postupi po odredbama člana 30;
  - g) ako ne organizira zaštitu od požara i vatrogastvo u smislu člana 31;
  - h) ako ne organizira vatrogasnu jedinicu u smislu člana 33. stavovi (1) i (6).

#### Član 67.

Novčanom kaznom od 100,00 KM do 800,00 KM kaznit će se za prekršaj fizičko lice:

- a) ako ne organizira i ne provodi zaštitu od požara u smislu člana 5. stav (2);
- b) ako ne provodi zaštitu od požara u smislu člana 5. stav (4);
- c) ako postupa suprotno odredbi člana 5. stav (6).

### TREĆI DIO - PRELAZNE I ZAVRŠNE ODREDBE

#### Član 68. (Primjena zakona)

- (1) Na sva ostala pitanja iz oblasti zaštite od požara i vatrogastva koja nisu utvrđena ovim Zakonom primjenivat će se važeći Federalni zakon iz oblasti zaštite od požara i vatrogastva.

#### Član 69. (Usklađivanje postojećih propisa)

- (1) Odredbe kantonalnih zakona i drugih propisa, koje su u suprotnosti sa ovim Zakonom, uskladit će se sa odredbama ovog Zakona, u roku od še-

st mjeseci od dana stupanja na snagu ovog Zakona.

#### Član 70. (Stupanje na snagu)

Ovaj Zakon stupa na snagu osmog dana od dana objavljivanja u „Službenim novinama Bosansko-podrinjskog kantona Goražde“.

Broj:01-02-935/21      PREDSEDavajuća  
28.12.2021.godine      S K U P Š T I N E  
G o r a ž d e      Aida Sirbubalo,s.r.

967

Na osnovu člana 33.a Ustava Bosansko-podrinjskog kantona Goražde („Službene novine Bosansko-podrinjskog kantona Goražde“, broj: 8/98, 10/00, 5/03 i 8/04), **donosi m:**

### U K A Z O PROGLAŠENJU ZAKONA O IZMJENAMA ZAKONA O KANTONALNOJ UPRAVI ZA CIVILNU ZAŠTITU BOSANSKO- PODRINJSKOG KANTONA GORAŽDE

Proglašava se Zakon o izmjenama Zakona o Kantonalnoj upravi za civilnu zaštitu Bosansko-podrinjskog kantona Goražde, koji je donijela Skupština Bosansko-podrinjskog kantona Goražde, na 22. redovnoj sjednici, održanoj 28. decembra 2021. godine.

Broj:02-02-162/21      P R E M I J E R  
28.12.2021.godine      Aida Obuća,s.r.  
G o r a ž d e